

Visoki predstavnik: Konstruktivan kompromis u BiH ne može imati alternativu

Visoki predstavnik Valentin Inzko sastao se danas u Pragu sa prvim zamjenikom ministra vanjskih poslova Češke Republike Jiřijem Schneiderom. Također se sastao i sa bivšim ministrom vanjskih poslova Karelom Schwarzenbergom.

Informirajući g. Schneidera o političkoj situaciji u Bosni i Hercegovini, visoki predstavnik je rekao da Bosna i Hercegovina u ovom trenutku pred sobom ima priliku te je izrazio nadu da će politički i institucionalni lideri u Bosni i Hercegovini iskoristiti tu priliku.

U razgovoru sa zamjenikom ministra Schneiderom, visoki predstavnik Inzko izrazio je nadu da će se duh kompromisa na Zapadnom Balkanu preliti i u Bosnu i Hercegovinu. Klima u regiji je bolja nego ikada ranije i to za zemlju predstavlja jedinstvenu priliku. „Dogovori među strankama u Bosni i Hercegovini su jedini način da se ide naprijed i kompromis ne smije imati alternativu,” rekao je visoki predstavnik.

Visoki predstavnik je zahvalio zamjeniku ministra Schneideru na ustrajnoj i neprekidnoj diplomatskoj, političkoj i ekonomskoj podršci Češke Republike Bosni i Hercegovini.

Valentin Inzko je također prisustvovao obilježavanju 20. godišnjice Austrijskog kulturnog instituta u Pragu, kojeg je on osnovao prije nego je u Sarajevu uspostavio Austrijsku ambasadu. Po otvaranju, u Institutu su održani mnogi događaji, od kojih su neki bili posvećeni situaciji u Bosni i Hercegovini tokom rata. Jednu od izložbi posjetio je i tadašnji predsjednik Češke Republike Václav Havel.